

四庫全書

集部

欽定四庫全書

集部

劔南詩藁卷十一

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷十一

宋 陸游 撰

對酒

識字記姓名擊劔一人敵
孫吳相斫書了解亦何益
不如黃金壘湫湫春波碧
欣然對之笑未飲愁已釋
白頭生黑絲蒼顏桃李色
金丹空九轉正恐無此力
朝飲續五斗莫飲髡一石
寄謝采芝翁無為老青壁

遣興

西州落魄九年餘，濯錦江頭已結廬。
誰遣徑歸朝鳳闕，

不令小住奉魚書。

余將赴楚道被命東歸

塵埃眯目詩情盡，疾病

侵人酒興疎。寄語鶯花休入夢，
世間萬事有榮除。

建安雪

建谿官茶天下絕，香味欲全須小雪。
雪飛一片茶不憂，
何況蔽空如舞鷗。
銀瓶銅碾春風裏，
不枉年來行萬里。
從渠荔子腴，
玉膚自古難兼熊掌魚。

雪晴至後園

病扶藤杖覓殘梅
牢落情懷怕酒盃
約束園丁勤灑掃
新年作意待春來

又

寶馬東風擁犢車
碧雞坊裏擅豪華
南來強作尋春夢
何處如今更有花

開元莫歸

白髮書生不自珍
天涯又作宦遊身
谿橋煙淡偏宜晚

梵寺花遲未覺春日暝登山思謝屐病餘漉酒負陶巾
茹芝却粒平生事回首巖扉一愴神

寺在紫
芝山下

書懷

濯錦江頭成昨夢紫芝山下又新年久因多病疎雲液
近為長齋進玉延啼鳥傍簷春寂寂飛花掠水晚翩翩
支離自笑生涯別一炷爐香繡佛前

遊鳳皇山

窮日文書有底忙幅巾蕭散集山堂一樽病起初浮白

連焙春遲未過黃坐上清風隨塵柄歸途微雨發松香
臨溪更覓投竿地我欲時來小作狂

園中雜書

蕭蕭慈竹鳥呼風宛似山光小閣東剗欲杖藜尋昨夢

更添紅綻綠陰中

山光閣在
潭毒關下

又

北窗看鏡意淒然夢斷梁州已七年獵獵綵旗春日晚

不堪花外見鞦韆

山南鞦韆最盛
巷陌處處有之

又

筍生密密復疎疎
來看偏宜曉雨餘
乞與人間作圖畫
幅巾短褐小籃輿

又

殘花委地筍掀泥
香枕詩囊到處攜
幽夢欲成誰喚覺
半窗斜日鷓鴣啼

烹茶

麴生可論交
正自畏中聖
年來衰可笑
茶亦能作病
噎

嘔廢晨飧支離失宵暝是身如芭蕉寧可與物競兔甌
試玉塵香色兩超勝把玩一欣然為汝烹茶竟

病中久止酒有懷成都海棠之盛

碧雞坊裏海棠時彌月兼旬醉不知馬上難尋前夢境
樽前誰記舊歌辭目窮落日橫千嶂腸斷春風把一枝
說與故人應不信茶煙禪榻鬢成絲

北齋

新竹侵幽幔疎蓮散遠汀研朱朝點易搗藥夜潢

橫一作

經巖壑知心賞琴樽樂性靈會當煩太史一奏少微星

出塞曲

千騎為一隊萬騎為一軍朝踐狼山雪莫宿榆關雲將
軍羽箭不虛發直到祈連無雁羣隆隆春雷收陣鼓蜿
蜿驚蛇射生弩落蕃遺民立道邊白髮如霜淚如雨褫
魄敵人作窮鼠競裏頭顱不敢語陣前乞降馬前舞檄
書夜入黃龍府

思故山

千金不須買畫圖聽我長歌歌鏡湖湖山奇麗說不盡
且復為子陳吾廬柳姑廟前魚作市道士莊畔菱為租
一彎畫橋出林薄兩岸紅蓼連菰蒲陂南陂北鴉陣黑
舍西舍東楓葉赤正當九月十月時放翁艇子無時出
船頭一束書船後一壺酒新釣紫鰕魚旋洗白蓮藕從
渠貴人食萬錢放翁癡腹常便便莫歸稚子迎我笑遙
指一抹西村煙

送錢仲耕修撰

姑孰溪邊識勝流十年重見豈人謀自應客路難為別
不是陽關作許愁瀑直公看鰲禁月倦遊我夢鏡湖秋
殷勤為報中朝舊睡足平生是建州

建寧重五

霏微入戶黃梅雨磊落堆盤碧筒黍病來一滴不飲酒
但嗅菖蒲作端午人生忽忽東逝波白頭奈此節物何
去年已作歸州客今年建州更愁絕歸州猿吟鳥啼裏
屈沱醉歸詩滿紙

屈沱蓋屈原故居楚人謂江之別流為沱

即今憶此那可

得西望歸州三嘆息

雨晴至園中

入夏經月雨園路久已荒今朝偶一到蒿艾如人長豈
惟鼃龜豪頗覺蜂蝶狂悵然懷故山舍東百本桑迨此
積雨餘枝葉沃以光父老適相遇藉草揮一觴一觴頽
然醉笑語相扶將賦詩示兒子此樂未易忘

夏日

微風過中庭庭樹颯有聲穿簾徐入座巾屨有餘清

又

展畫發古香
弄筆娛晝寂
是中亦何好
使我喜忘食

又

呼兒整吾駕
駕言返林廬
可使臨老眼
常親吏文書

發書畫還故山戲書

昨日遣畫筍
今日發書簾
空齋惟一牀
窗影亂風竹
平生鑽故紙
夙好老尤篤
竒哉掃除盡
蟬蛻三萬軸
豈惟息煩心
亦足養病目
從渠褊褊生
自獻公車牘

白髮

白髮千莖綠鬢稀
臥看鷓鴣刺天飛
平生竊鄙貢公喜

故里但思陶令歸
清坐了無書可讀

近盡遣書笥歸

殘年賴有

佛堪依
君看世事皆虛幻
屏酒長齋豈必非

懷譚德稱

譚子文章舊有聲
幾年同客錦官城
江樓列炬千鍾飲
花市聯鞍一字行
人世絕知非昨夢
天真堪笑博浮名
空齋獨夜蕭蕭雨
枕上詩成夢不成

客思

千里關山道路賒可憐客子費年華
杯觴灩灩紅燒酒風露盈盈紫笑花
孤月有情來海嶠雙魚無信到天涯
此生那得常飄泊歸臥東溪弄釣車

又

兩鬢星星久倦遊淒涼況復寓南州
未甘蟋蟀專清夜已嘆梧桐報素秋
綺語安能敵生死熱官正欲快恩讐
空堂飽作東歸夢夢泊嚴灘月滿舟

舟行還山陰
道出七里灘

建安遣興

建安酒薄客愁濃
除却哦詩事事慵
不許今年頭不白
城樓殘角寺樓鐘

又

錦城重到嘆無期
忽憶書臺步月時
白浪黏天鮫鰓橫
夢中識路亦何為

又

今歲清詩欠百篇
強尋筆硯意茫然
秋風有句君知否

合在嚴光釣瀨邊

又

古今清絕沅湘路
臥想蒲帆十幅開
不是避人思遠適
肺肝塵土要詩才

又

綠沈金鎖少時狂
幾過秋風古戰場
夢裏都忘閨嶠遠
萬人鼓吹入平涼

又

刺虎騰身萬目前
白袍濺血尚依然
聖時未用驍騰將
虛老龍門一少年

病起偶到復菴

經旬羸臥怯登臨
偶憶東菴試一尋
新竹初成迷棧路
菴後依古城
有小棧百步斷雲不散抱城陰
陂池綠靜龜魚樂
亭館

蒼涼草樹深
欲把一盃無奈嬾
病來觸目動歸心

前有樽酒行

虛堂雨過生涼颼
勸君一醉君勿辭
去年不知今歲事

明年萬事今得知舊時扶床同戲兒還鄉問訊令人悲
冢丘累累在者誰紙錢雨濕抱樹枝君去六十有幾時
更望七十何其癡求師學道亦已遲謝客努力從鷗夷

又

綠酒盎盎盈芳樽清歌嫋嫋留行雲美人千金織寶帶
水沈龍腦作燎焚問君胡為慘不樂四紀烽烟暗幽朔
諸人但欲口計功茫茫九原誰可作丈夫可為酒色死
戰場橫屍勝牀第華堂樂飲自有時少待尅敵獻天子

遊南塢院

小破文書夢闌成杖履遊澗幽泉激激院靜竹修修病
骨涼如洗歸心浩莫收舩輕不載石一葉亂沙鷗

感懷

半年建安城士友闕還往出門每太息還舍猶愴怳有
酒誰與傾得句空自賞疎直觸人情低回泚吾顙豈無
佳山水正爾寄夢想何當載親朋煙浦搖兩槳

雨夜

一雨遂通夕安眠失百憂窗扉淡欲曉枕簟凜生秋
燭爭碁道金尊數酒籌依然錦城夢忘却在南州

夜坐偶書

衰髮蕭疎雪滿簪莫年光景易駸駸已甘身作溝中斷
不願人知爨下音病鶴摧頽分薄俸悲蛩斷續和微吟
向來誤有功名念欲挽天河洗此心

長歌行

人生宦遊亦不惡無奈從來宦情薄既不能短衣射虎

在南山又不能鬪雞走馬宴平樂惟有釣船差易具問
君胡為不歸去片雲雨暗玉笥峰斜日人爭石旗渡渡
頭酒壚堪醉眠白酒醇醲鱸魚鮮菰米如珠炊正熟蓴
羹似酪不論錢翁唱菱歌兒舞擢醉耳那知朝市鬧城
門幾度送迎官睡擁亂蓑呼未覺

雨夜不寐觀壁間所張魏鄭公砥柱銘

疾風三日橫吹雨竹倒荷傾可憐汝空堂無人夜向中
臥看牀前燭花吐壯懷耿耿誰與論檣牀老龜不能語

世間豈無一好漢叱咤喑鳴力如虎壁間三丈砥柱銘
貞觀太平如更覩何當鼓吹渡河津下馬觀碑馳馬去

客談荆渚武昌慨然有作

去歲出蜀初東遊我舸大艣下荊州便風轉頭五百里
吟嘯已在黃鶴樓戲拈鐵笛吹出塞水涵月落魚龍愁
明朝喧傳古仙過碧玉帶束黃紬裘豈知一官自桎梏
簿書期會無時休豐城寶劒已化久我自吐氣冲斗牛
洞庭四萬八千頃蟹舍正對蘆花洲速脫衣冠挂神武

散髮爛醉垂虹秋

書懷

青城結雲巢擬住三千年御風偶南遊萬里棲紫煙翠
裘綠玉杖白日凌青天招呼方瞳翁邂逅烏爪仙朝咏
陰陽歌暮誦道德篇玉童持碧簡笙鶴來翩翩海邊武
夷山小留賞宿緣火食非所樂巾褐常條然清時未免
出頗息世俗傳行矣秋風高去采玉井蓮

平生

平生涉世似虛舟不著胸中一點愁已用浮雲看富貴
肯緣華屋嘆山丘戴溪寒釀千峯雪巖瀨聲酣七里秋
好景人間隨處有未埋白骨且閒遊

自詠

遊戲人間歲月多癡頑將奈此翁何放開繩筆牛初熟
照破乾坤鏡未磨日落苔磯閒把釣雨餘蓬舵亂堆蓑
明朝不見知何處又向江湖醉踏歌

池亭夜賦

池上小亭幽清宵秉燭遊荷盤時瀉露螢火早知秋有
感歲時速無聲河漢流殊方不堪住歸夢繞滄洲

雨夜偶書

高臥空堂風雨來更闌頻看燭花摧新涼蕭爽秋期近
多病侵尋老境催萬事極知終變滅一官那得久低回
牀頭幸有楞伽在更炷爐香手自開

思歸

平生無宦情方外久浪迹往來梁益間一笑頗自得花

穠錦城酒月白瞿塘笛咿啞下江舫跌宕登山屐巴東
煙雨秋渭上風雪夕至今客枕夢萬里不能尺誰知建
安城觸目非夙昔冥冥瘴霧細湫湫蠻江碧出門無交
朋嗚呼吾何適歸哉故山路詎必須暖席

客懷

客懷耿耿向誰語世事茫茫空自知堅坐嬾窮牛渚怪
倦遊何恨雁門踦眼前客共一盃酒身後人傳千首詩
報與故交當賀我計歸猶及菊花時

伏中官舍極涼戲作

盡障東西日洞開
南北堂漏從閒處
永風自遠來涼客
愛炊菰美僧誇瀹
茗香曉來秋色起
肅肅滿筠牀

夢與劉韶美夜飲樂甚

死生契濶十年餘
欲話交情涕已濡
夢裏偶同清夜宴
醉中猶攬故人鬚
岸巾談笑今誰記
滿腹詩書只自愚
我亦與公同此病
早收身世老江湖

暑夜

毒暑彌三伏微涼起二更月窗風竹亂煙渚露荷傾寂
寞借書讀清羸扶杖行無功耗官廩太息負平生

客意

山行曳杖水拏舟走遍茫茫禹畫州蝴蝶夢魂常是客
芭蕉身世不禁秋早因食少妨高臥晚憶茶甘作遠遊
龍焙一嘗端可去無心更為荔枝留

夜香

投老誤禱傳竊食慙無功清夜一炷香實與天心通忤

物雖至愚許國猶孤忠一念倘自欺百年寧有終上帝
職造化生殺操至公稽首矢此心其敢累兒童

柴懷叔殿院世綵堂

卷服貂冠世間有榮悴紛紛翻覆手不如御史老萊衣
世綵堂中奉春酒北斗為觴山作豆鳳竹鸞絲太中壽
今年宗祀降恩綸太中拜前公拜後嗚呼人誰無父母
盛事有及公家否萬鍾苦晚三釜薄人生此恨十八九
我欲殺青書孝友愧非太史馬牛走聖朝若遣采詩官

尚可為公圖不朽

月夜

小醉初醒月滿床
玉壺銀闕不勝涼
天風忽送荷香過
一葉飄然憶故鄉

雙清堂夜賦

陸子病少間獨臥谿上堂
人靜魚自躍風定荷更香
素月行中天流螢失孤光
歸鳥飛有聲度此十里塘
嗟我獨何事遲莫客異鄉
太息搔短髮起視夜未央

采蓮

蘸水朱扉不上關
采蓮小舫夜深還
一樽何處無風月
自是人生苦欠閒

又

雲散青天挂玉鉤
石城艇子近新秋
風鬟霧鬢歸來晚
忘却荷花記得愁

又

帝青天映麴塵波
時有遊魚動綠荷
回首家山又千里

不堪醉裏聽吳歌

橋南納涼

曳杖來追柳外涼
畫橋南畔倚胡牀
月明船笛參差起
風定池蓮自在香
半落星河知夜久
無窮草樹覺城荒
碧筒莫惜頽然醉
人事還隨日出忙

芒屨

芒屨一雙青筇枝九節輕
登山猶健在投檄太遲生
滿
意竹風冷入懷
溪月明清秋故不遠
回首憶蓴羹

荔子絕句

驛騎星馳亦快哉
筠籠露濕手親開
不應相與無平素
曾忝戎州刺史來

又

放翁遊蜀十年回
病眼茫茫每嬾開
怪底酒邊光景別
方紅江綠一時來

官舍夙興

朝陽淡淡挂窗櫺
桐葉無風忽自零
不復扶頭傾白墮

但知臨目養黃寧
新蔬帶露來幽圃
脩綆飛泉灑廣庭
一出文書又圍繞
正應高臥盡頽齡

書懷

功名富貴兩茫茫
惟有躬耕策最長
吏牘沈迷妨養疾
囊衣結束待還鄉
洲中未種千頭橘
宅畔先栽百本桑
書寄子公吾自嬾
故人不是總相忘

風月

老來苦無伴
風月獨見知
未嘗費招呼
到處相娛嬉
披

襟萬里快弄影三更奇淋漓蜀苑酒散落江樓詩狂歌
撼山川醉墨飛蛟螭聊將調俗子更遣半生疑

大將出師歌

將軍北伐辭前殿恩詔催排苑中宴紫陌驚塵中使來
青門立馬羣公餞繡旗雜沓三十里畫鼓敲鐙五千面
行營暮宿咸陽原滿朝太息傾都羨天聲一震敵已亡
捷書奕奕如飛電高秋不閉玉關城中夜罷傳青海箭
山川圖籍上有司張掖酒泉開郡縣還朝策勛兼將相

詔假黃鉞調金鉉大夫未遇誰得知昔日新豐笑貧賤

婕妤怨

妾昔初去家鄰里持車箱共祝善事主門戶望寵光一
入未央宮顧盼偶非常穉齒不慮患傾身保專房燕婉
承恩澤但言日月長豈知辭玉陛翩若葉隕霜永巷雖
放棄猶慮重謗傷悔不侍宴時一夕稱千觴妾心剖如
丹妾骨朽亦香後身作羽林為國死封疆

移疾

朝來移疾臥虛堂
暫屏文書日更長
鷗鷺近人情漸熟
簾櫳欲雨意先涼
紗巾自照清池影
藍笈閒銷古篆香
莫恨微霜侵綠鬢
為渠歇盡少年狂

病中懷故廬

我家山陰道湖山
淡空濛小屋如舴艋
出沒煙波中天
寒橘柚黃霜落穉
稭紅祈蠶簫鼓鬧
賽雨雞豚空义魚
有竭作刈麥無遺
功去年一月留行
役嗟匆匆今年歸

興動艤舟待秋風社飲可欠我寄書約隣翁

夏夜不寐有賦

急雨初過天宇濕大星磊落纔數十飢鶻掠簷飛磔磔
冷螢墮水光熠熠丈夫無成忽老大箭羽凋零劍鋒澀
徘徊欲睡復起行三更猶凭闌干立

綠淨亭晚興

綠淨亭邊物色奇放翁睡起曳筇枝新涼已似雁來後
微雨却如梅熟時綠竹成陰藏細棧朱闌倒影入清池

登臨獨恨非吾土，不為城頭畫角悲。

憶山南

貂裘寶馬梁州日，盤槊橫戈一世雄。
怒虎吼山爭雪刃，驚鴻出塞避雕弓。
朝陪策畫清油裏，莫醉笙歌錦幄中。
老去據鞍猶矍鑠，君王何日奏雷功。

又

醉墨淋漓酒百盃，轅門山色碧崔嵬。
打球駿馬千金買，切玉名刀萬里來。
結客漁陽時遣簡，踏營渭北夜銜枚。

十年一夢今誰記
閉置車中只自哀

夕雨

屣履行莎徑
移牀臥草亭
風聲雜溪瀨
雨氣挾龍腥
奕奕空中電
昏昏雲罅星
徂年又如許
吾鬢得長青

又

獨夜初傳漏
空絲半掩扉
候蟲燈下語
水鳥雨中歸
客舍愁彈劍
京塵怯化衣
故人招隱意
字字莫相違

試茶

北窗高臥鼾如雷誰遣香茶挽夢回綠地毫甌雪花乳
不妨也道入閩來

莆陽餉荔子

江驛山程日夜馳筠籠初折露猶滋星毳皺玉雖奇品
終憶戎州綠荔枝

初秋書懷

二十年前已二毛即今何恨鬢蕭騷孤燈自伴詩情苦
俗子從嫌醉眼高煙外莫鐘來遠寺雨餘秋漲集空壕

思歸更向文書嬾此手惟堪把蟹螯

建州絕無炎意頗思之戲作

鄉國雞頭賣早秋綠荷紅縷最風流
建安城裏西風冷白棗堆盤看却愁

憶昔

憶昔西遊變姓名獵圍屠肆押豪英
淋漓縱酒滄溟窄慷慨狂歌華岳傾
壯士有心悲老大窮人無路共功名
生涯自笑惟詩在旋種芭蕉聽雨聲

客思

裘馬平生喜遠遊，莫年顚顚向南州。
文書與睡中分日，衰病和愁總怕秋。
無復雪郊看射虎，但思煙浦聽呼牛。
還家誰道無餘俸，倒橐猶堪買釣舟。

初秋夢故山覺而有作

陂水白茫茫，草煙濕霏霏。
牧童一聲笛，落日無餘暉。
遙山已漸隱，村巷亞竹扉。
老翁延我入，苦謝柿栗微。
幸逢歲有秋，一醉君勿違。
念此動中懷，命駕吾將歸。

又

犬吠舍前後月明村東西岸草蛩亂號庭樹鳥已栖我
僕城中還擔頭有懸雞小兒勸我飲村酒拆赤泥我醉
不自覺頽然葛巾低著書笑蒙莊茗芋物自齊

又

昔我東歸時父老迎船頭開蓬相勞苦怪我領雪稠故
山何負君且作數月留豈知席未煖足馬來南州蠻花
四時紅瘴霧日夜浮歸哉不可遲勿與婦子謀

又

杜宇真吾交勸去恨不速忠告輸肝肺厚意均骨肉陋
哉鷓鴣語揣我貧念祿竹雞更鄙淺泥淖憂車軸秋風
嚴瀨清春雨戴溪綠行矣勿復疑照影巾一幅

寓嘆

千載前人每暗同眼邊俗客馬牛風作文要可張子布
飲酒思從陳孟公半世氛埃成潦倒幾時蓑釣入空濛
一菴處處皆堪老莫怕無山著此翁

雙清堂醉臥

客裏逢秋醉似泥
空堂獨臥意淒迷
亂號庭樹西風急
斜掛城樓北斗低
末路敢貪請鶴料
微官久厭駕雞棲
平生玉局經行地
擬乞冰衙隱剡溪

醉書

半年愁病劇一雨
喜涼新稍與藥囊
遠初容酒醺親浩
歌驚世俗狂語任
天真我亦輕餘子
君當恕醉人

憶唐安

南鄭戍還初過蜀朝衫與鬢猶爭綠逢春飲酒似長鯨
醉裏千篇風雨速唐安池館夜宴頻潏潏玉船搖畫燭
紅索琵琶金縷花百六十絃彈法曲曲終却看舞霓裳
嫋嫋宮腰細如束明朝解醒不用酒起尋百畝東湖竹
歸吳寂莫時自笑縱有詩情誰省錄今年二頃似可謀
去斲雲根結茅屋

秋懷

莫年身世轉悠悠又向天涯見早秋昨夜月明今夜雨

關人何事總成愁

又

星斗闌干河漢流建州風物更禁秋年來多病題詩嬾
付與鳴蛩替說愁

晝臥聞碾茶

小醉初消日未晡幽窗催破紫雲腴玉川七盃何須爾
銅碾聲中睡已無

月下獨行橋上

新秋未再旬月露已浩然放翁一幅巾與影俱翩僊飛
橋挂澄谿幽竇鳴細泉開歲纔俛仰已近搖落天殊方
久滯留感此歲月遷歸來看青燈悄愴不得眠

夜意

火雲夕方收草露秋已白堂空燈欲翳壁壞蟲自嘖四
顧寂無人獨立岸吾憤窮通何足論等是百年客何能
為一飽半世出下策布帆幸無恙誰謂江海迹

秋夜書懷

斷香漠漠繞藤牀
新月娟娟轉畫廊
鄉遠每勞千里夢
雨慳未放九秋涼
衰遲分作驥伏櫪
歛退敢求錐出囊
剡喜今年有奇事
嚴遵灘下繫歸航

思故廬

平生一束書不為屋廬計
微官寄郵傳俯仰閱半世
草堂白雲邊日夜長松桂
柴門入幽夢落日亂蟬鳴
官遊有何好海角愁瘴癘
拂衣便可耳勿使老春薺

雨夜

小雨初涼夜殘燈欲暗時病多愁近酒心弱怯題詩舊
友殊方少歸耕晚歲宜回頭語孤影此意有君知

北窗哦詩因賦

二十年來賦遠遊一窗又復寄南州雙鵝戲雨陂塘曉
亂葉飄風院落秋顏鬢蹉跎愁覽鏡江山重複怯登樓
平生事業詩千首殘稿從教處處留

又

露下螢飛仲秋月山圍水繞建安城病多不辨酒中聖

身遠且令心太平數卷蠹書行老矣一盂蔬飯太憎生
白雲只在簷間宿聽我清宵詠句聲

倣裝

絕物離人恨未能聊為旦過打包僧蹇驢渺渺秋山雨
孤榻昏昏夜店燈酒量已隨詩共退客愁仍與病相乘
頽然衰颯嗟誰識俠氣當年蓋五陵

追感梁益舊遊有作

西遊萬里倚朱顏肯放尊前一笑慳蜀苑妓圍欺夜雪

梁州獵火滿秋山
晚途忽墮塵埃裏
樂事渾疑夢寐間
浮世變遷君勿歎
劇談猶是詫鄉關

莆陽昭武延平送兵漸集戲書

鼓聲晨統統角聲莫鳴鳴
作官了何事空歎歲月徂
送兵稍稍集秣馬脂吾車
風霜迫搖落殘暑亦已無
野渡明丹楓破驛吹黃榆
聊收作詩料未用厭征途

別建安

三十年来雲水僧
常挑鉢帑繫行縈
信緣不作癡巢窟

即是吾家無盡燈

又

楚澤吳山已慣行
武夷從昔但聞名
北巖小寺長汀驛
且喜遊山第一程

又

歌帽揚鞭晚出城
驛亭燈火向人明
多情葉上蕭蕭雨
更把新涼送客行

初發建安

小雨初收雲未歸
吾行迨及晚秋時
寒沙新雁無人問
露井殘桐有客悲
征袂拂霜晨喚馬
驛窗剪燭夜題詩
悠然且作尋山想
夢裏功名莫自期

宿北巖院

車馬紛紛送入朝
北巖燈火夜無聊
中年到處難為別

也似初程宿灞橋

岑參詩云初程莫早發
且宿灞橋頭語意至工

書感

溪路人家尚闔扉
彊扶衰憊著征衣
百年朝露古所歎

一櫂秋風吾欲歸
楚客長號沽白壁
漢宮太息遣明妃
鑠金銷骨從來事
老矣何心踐駭機

長汀道中

晚過長汀驛
溪山乃爾奇
老夫惟坐歎
造物為陳詩
鳥送穿林語
松垂拂澗枝
憑鞍久忘發
不是馬行遲

黃亭夜雨

去武夷四十里

未到名山夢已新
千峰拔地玉嶙峋
黃亭一夜風吹雨
似為遊人洗俗塵

遊武夷山

少讀封禪書始知武夷君晚乃遊斯山秀傑非昔聞三十六奇峯秋晴無纖雲空巖雞晨號峭壁丹夜暎巢居寄千仞鴻荒想羲軒風雨蛻玉骨難以俗意論丹梯不容躡修蔓亦畏捫泝灘進小艇媿驚白鷺羣學道雖恨晚養氣敢不勤宦遊非本志寄謝鶴與猿

泛舟武夷九曲溪至六曲或云灘急難上遂回

暮年脚力倦躋攀借得扁舟臥看山怪怪奇奇何所似

綠蘿溪入下牢關

又

一葉凌風入硤來山童指點幾崔嵬急流勇退平生意
正要船從半道回

崇安縣驛

驛外清江十里秋雁聲初到荻花洲征車已駕晨窗白
殘燭依然伴客愁

過建陽縣以雙鵝贈東觀道士為長生鵝觀俯大

溪鵝得其所矣武夷險絕處有仙船架崖壁間
數日前大風吹墮船木數寸堅硬如石予偶得
之皆此行奇事也各賦一詩

閒泛晴波暖綠萍却衝微雨傍煙汀會稽內史如相遇
換取黃庭一卷經

右雙鵝

斷崖幽洞白雲深縹緲仙槎無古今飛下一峯相勞苦
却疑天外有知音

右墮木

紫谿驛

信州鉛山縣

它鄉異縣老何堪
短髮蕭蕭不滿簪
旋買一尊持自賀
病身安穩到江南

又

雲外丹青萬仞梯
木陰合處子規啼
嘉陵棧道吾能說
畧似黃亭到紫谿

鵝湖夜坐書懷

士生始墮地弧矢志四方豈若彼婦女齷齪藏閨房我
行環萬里險阻真備嘗昔者戍南鄭秦山鬱蒼蒼鐵衣
臥枕戈睡覺身滿霜官雖備幕府氣實先顏行擁馬涉
沮水飛鷹上中梁勁酒舉數斗壯士不能當馬鞍挂狐
兔燔炙百步香拔劒切大肉哆然如餓狼時時登高望
指顧無咸陽一朝去軍中十載客道傍看花身落魄對
酒色淒涼去年忝號召五月觸瞿唐青衫暗欲盡入對
衰涕滂今年復詔下鴻雁初南翔俯仰未閱歲上恩實

非常夜宿鵝湖寺
槁葉投客牀
寒燈照不寐
撫枕慨以慷
李靖聞征邊
病憊更激昂
裴度請討蔡
奏事猶裏創
我亦思報國
夢繞古戰場

信州東驛晨起

衣上征塵鬢畔霜
信州古驛憩歸裝
悲歌未肯彈長鋏
豪氣猶能臥大牀
半暗殘燈搖北壁
常飢老馬臥東廂
隣雞唱罷衣篝暖
自笑行人日日忙

玉山縣南樓晚望

小樓在何許正在南溪上空濛過釣船斷續聞漁唱征
途苦偏及舒嘯喜清曠安得此溪水為我變春釀

玉壺亭

玉壺亭上小徘徊閒對殘荷把一盃冠蓋交馳期會急
長官未必辨頻來

步過縣南長橋遊南山普寧院山高處有塢院及
小亭縹緲可愛恨不能到

偶扶藤杖過南津野寺長橋發興新暫就清溪照鬚鬢

不妨翠霧濕衣巾
山縈細棧疑無路
樹落崩崖欲壓人
朝暮有程常猝猝
何因攜酒上嶙峋

枕上感懷

五更攬轡山路長
老大誦書聲琅琅
古人已死心則在
度越秦漢窺虞唐
三更投枕窗月白
老夫哦詩聲嘖嘖
淵源雅頌吾豈敢
屈宋藩籬或能測
一代文章誰汝數
老不能閒真自苦
君王雖賞于為于
無奈宮中須羯鼓

晚過招賢渡

老馬骨嶮然虺殫不受鞭行人爭晚渡歸鳥破秋煙湖
海淒涼地風霜搖落天吾生半行路搔首送流年

臥輿

白首躬耕已有期鳳城歸路却遲遲臥輿擁被聽秋雨
占盡人間好睡時

奏乞奉祠留衢州皇華館待命

世念蕭然冷欲冰更堪衰與病相乘從來幸有不材木
此去真為無事僧

見丹霞錄

耐辱豈惟容唾面寡言端擬學

銘膺尚餘一事猶豪舉醉後龍蛇滿剡藤

寓舍偶題

轉徙身飄梗淹留等繫匏雁孤依遠渚鳩拙寄空巢寒
日頰梨頰清霜長橘包平生麴道士歲晚欲深交

夙興

客中睡眠少常以雞鳴興新炭熾宿火膏油續殘燈焚
香倚蒲團外靜中已凝滯辱兩不到淡如秋水澄出定
窗已白炯炯寒日昇厨人作芋糲供此在家僧

夜坐

老知世事謾紛紛
紙帳蒲團自策勲
一夜北風吹裂屋
石樓無耳不曾聞

偶得石室酒獨飲醉臥覺而有作

初寒思小飲
名酒忽墮前
素甕手自傾
色若秋澗泉
浩歌復起舞
與影俱翩僊
一笑遺宇宙
未覺異少年
詩人不聞道
苦歎歲月遷
豈知汝南市
自有壺中天
河洛久未復
銅駝森然
秋風歸去來
虛老玉井蓮

午睡

風霜踐殘歲我乃羈旅人如何得一室牀敷暖如春午
枕挾小醉鼻息撼四隣心安了無夢一掃想與因逡巡
起頻面覽鏡正幅巾聊呼蟹眼湯瀹我玉色塵

贈柯山老人

柯山老人九十餘亂髮不櫛瘦如枯百穿千結一布袴
得酒一吸輒倒壺自言少年不蓄孥有錢徑付酒家壚
人生辨此真良圖棄官從翁許我無

寓館晚興

隨牒人間不自憐
衢州孤驛更蕭然
百年細數半行路
萬事不如長醉眠
髮短經秋真種種
腹寬耐事只便便
晚窓商畧唯當飲
安得黃花到眼邊

今年九月將
盡竟未見菊

葉相最高亭

高亭新築冠鰲峯
眼力超然信不同
膚寸油雲澤天下

大千沙

一作法

界納胷中春遊到處羣
花擁夜宴歡時百

榼空劉白老來忘世味
只思詩酒伴裴公

裴晉公留守
東都白樂天

劉夢得以分務
與晉公倡酬

婺州州宅極目亭

尚書曳履上星辰小為東陽作主人
朱閣凌空雲縹緲
青山繞郭玉嶙峋似聞旋教新歌舞
且慰重臨舊吏民
莫倚闌干西北角即今河洛尚沙塵

謝演師送梅

早梅時節到江南已判樽前酒滿衫
輸與西鄰明上座
解從大庾嶺頭參

又

折送江梅意不疎
要教相對闢清臞
為君著向明窓下
試問山翁具眼無

訪毛平仲問疾與其子适同遊柯山觀王質爛柯
遺跡

籃輿訪客過仙村
千載空餘一局存
曳杖不妨呼小友
還家便恐見來孫
林巒巉絕秋風瘦
樓堞參差暮氣昏
酒美魚肥吾事畢
一菴那得住雲根

月巖

幾年不作月巖遊
萬里重來已白頭
雲外連娟何所似
平羌江上半輪秋

弋陽縣驛

大雨山中采藥回
了頭巖畔覓詩來
喚船野渡逢迎雪
攜酒溪頭領畧梅
久客愁心端欲折
何時笑口得頻開
慇懃記著今朝事
破驛空廊葉作堆

弋陽道中遇大雪

我行江郊暮猶進大雪塞空迷遠近壯哉組練從天來
人間有此堂堂陣少年頗愛軍中樂跌宕不耐微官縛
憑鞍寓目一悵然思為君王掃河洛夜聽簌簌窓紙鳴
恰似鐵馬相磨聲起傾斗酒歌出塞彈壓胸中十萬兵
雪中感成都

憶在西州遇雪時繡筵處處百花圍烏絲闌展新詩就
油壁車迎小獵歸感事鏡鸞悲獨舞寄書箏雁恨慵飛
愁多自是難成醉不為天寒酒力微

雪後苦寒行饒撫道中有感

殘雪暮還結朔風晴更寒重裘猶粟膚連酌無辭顏指
直不可握終日縮袖間十年走萬里何適不艱難附火
財須吏攬轡復慨歎恨不以此勞為國戍玉關

對酒

溫如春色爽如秋一榼燈前自獻酬百萬愁魔降未得
故應用爾作戈矛

又

歎息人真未易知暮年始覺麴生奇
個中妙趣誰堪語最是初醺未醉時

梅花

臨州道中見梅
數樹憔悴特甚

我與梅花有舊盟即今白髮未忘情
不愁索笑無多子惟恨相思太瘦生
身世何曾怨空谷風流正自合傾城
增冰積雪行人少試倩羈鴻為寄聲

雪中尋梅

莫遣扁舟興盡回正須衝雪看江梅
楚人原未知真色


施粉何曾太白來

又

幽香淡淡影疎疎
雪虐風饕亦自如
正是花中巢許輩
人間富貴不關渠

江上梅花

老來樂事少關身
猶喜尊前見玉人
豈是淒涼偏薄命
自緣纖瘦不禁春
娟娟月上明江練
黯黯天低糝玉塵
絕碛斷橋幽獨處
護持應有主林神



劔南詩藁卷十一

欽定四庫全書

集部
劔南詩橐卷十二

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷十二

宋 陸游 撰

擬峴臺觀雪

垂虹亭上三更月擬峴臺前清曉雪我行萬里跨秦吳
此地固應名二絕山川滅沒雪作海亂墜天花自成態
狂歌痛飲豪不除更憶銜枚馳出塞蘆摧葦折號飢鴻
欲傳粉墨無良工摩挲東絹三歎息收入放翁詩卷中

明朝青天行日轂萬瓦生煙失瓊玉世間成壞本相尋
却看晴山暈眉綠

舊在成都初春無事日訪昭覺保福正法諸刹甚
可樂也追懷慨然因賦長句

憶在西川集寶坊幅巾蕭散日初長伊蒲塞饌分香積
優鉢羅花散道場客路逢春增感慨舊遊回首已微涼
新晴強作尋幽計有底文書作許忙

園中賞梅

閱盡千葩百卉春此花風味獨清真江邊曉雪愁欲語
馬上夕陽香趁人慰眼紅苞初報信回頭青子又生仁
羈遊偏覺年華速徙倚闌干一愴神

又

行遍茫茫禹畫州尋梅到處得閒遊春前春後百回醉
江北江南千里愁未愛繁枝壓紗帽最憐亂點糝貂裘
一寒可賀君知否又得幽香數日留

正月十五日出郊至金石臺

漸老惜時節思遊邨可忘雪晴天淺碧春動柳輕黃笑
語寬衰疾登臨到夕陽未須催野渡聊欲據胡牀

又

開歲多休暇官身亦暫閒樓臺先晝永花柳向春慳啼
鳥隨遊轡和風慙醉顏更憐歸路好破墨數峯山

晚歸
見西

南諸山
如畫

六日小飲園中光景鮮妍紅梅已拆恍記在果州

偶得絕句

輕裘駿馬金泉路

金泉蓋謝自然輕舉之地

默數新春又九年風景

不殊人自老忽驚作夢到臨川

聞雁

過盡梅花把酒稀熏籠香冷換春衣秦關漢苑無消息
又在江南送雁歸

撫州上元

江月微雲外街泥小雨餘人如虛市散燈似曉星疎羈
雁同身世新霜上鬢鬚明年更清絕漁火對茅廬

登擬峴臺

層臺縹緲壓城闌倚杖來觀浩蕩春
放盡樽前千里目洗空衣上十年塵
縈迴水抱中和氣平遠山如醞藉人
更喜機心無復在沙邊鷗鷺亦相親

燈夕有感

芙蓉紅綠亦參差睡起燒香強賦詩
萬里錦城無夢到豈惟虛負放燈時

庚子正月十八日送梅

滿城桃李爭春色不許梅花不成雪
世間尤物無盛衰
萬點縈風愈奇絕我行柯山眠酒家
初見窓前三四花
恨無壯士挽斗柄坐令東指催年華
今朝零落已可惜
明日重尋更無迹情之所鍾在我曹
莫倚心腸如鐵石

初春懷成都

我昔薄遊西適秦歸到錦城逢早春
五門收燈藥市近

小桃妖妍狂殺人

蜀中入春惟小桃先開似垂絲海棠

霓裳法曲華清譜

燕妬身輕鶯學語歌舞更休轉盼間
但見宮衣換金縷

世上悲歡豈易知不堪風景似當時
病來幾與麴生絕
禪榻茶煙雙鬢絲

春雨

冬旱土不膏愛此春夜雨四郊農事興
老穉迭歌舞相呼長沮耕分喜樊遲圃
豐年已在目亭障靜桴鼓我歸未有期
一官寄倉庾幸復寬簡書不敢恨羈旅

雨中遣懷

病中草草度年華睡起昏昏日易斜
抵死愁禁千斛酒

薄情雨送一城花
鏡湖煙水搖朱舫
錦里香塵走鈿車
此夢即今都打破
不妨寂寞住天涯

又

霏霏春雨細如絲
正是春寒欺客時
心向宦途元淡薄
夢尋鄉國苦參差
樓前新漲綠三尺
牆外尚餘紅幾枝
擺撥簿書呼酒榼
南湖西塢有幽期

晚晴

水聲泐泐赴回塘
簾影疎疎遶四廊
靜院數盃傾白墮

幽窓一枕夢清湘潤侵書笥深防蠹暝徹衣篝剗得香
解組徑歸應更樂偷閒猶足傲羲皇

春晚

五十六翁身百憂年來轉覺此生浮山川信美故鄉遠
天地無情雙鬢秋社後燕如歸客至春殘花不為人留
一觴一詠從來事莫笑扶衰又上樓

春晚坐講忽夢泛舟飲酒樂甚既覺悵然有賦

夢泛扁舟逸興多畫橈搖蕩麴生波微風款款生蒲葦

小雨霏霏濕芰荷
舞落烏紗從歲去
歌酣白紵奈情何
年來惟覺華胥樂
莫遣茶甌戰睡魔

遣興

老子癡頑慣轉蓬
殘年嬾復問窮通
赦書雖未除詩債
盟府猶當策酒功
桐嶺市回人踏月
柘岡月落鳥呼風
浮生觸處無真實
豈獨南柯是夢中

老去

老去時時病
春來日日陰
文書有期會
山水負登臨
倦

客風埃眼孤臣狗馬心餘寒欺短褐莫惜酒盃深

雨夜

百紫千紅占歲華又隨風雨捲泥沙即今空有夢為蝶
當日曾將命乞花倦枕殘燈人寂寞幽窓小草字欹斜
悲歡變滅何窮已學得山僧自一家

簡黎道士

滿箔吳蠶繭漸稠四郊膏雨麥方秋道人昔是茶山客
病叟新為藥市遊耆舊凋零誰晤語篇章璀璨尚風流

蘭亭剡曲春光好倘肯相從弄釣舟

臨川絕無佳酒時得一醉戲書

有酒時劇飲無酒徒浩歌庭花五六株老子獨婆娑誰
云苦寂寞在我亦已多莞弦萬二千一笑謝天魔夢作
青城去翠磴捫松蘿又為平羌遊素月沉煙波覺來撫
几歎奈此桎梏何流年不貸人去去如飛梭

醉中懷江湖舊遊偶作短歌

無渡河浪花無蒂高崢嶸莫登樓茫茫芳草難為情華

軒寶馬只好路旁看
冶金伐石空留後世名
古來惟有竹林諸人稱
達生一醉之外萬事鴻
毛輕可憐癡人競聲利
坐使方寸森五兵
散花洲上青山橫
野魚可膾菰可烹
脫冠散髮風露冷
臥看江月金盃傾

三月二十一日作

蹴踘牆東一市譁
鞦韆樓外兩旗斜
及時小雨放桐葉
無賴餘寒開棟花
明月吹笙思蜀苑
軟塵騎馬夢京華
懽情減盡朱顏改
節物催人只自嗟

天祺節日飯罷小憩

臥聽午漏隔花傳
簾裏花殘有斷煙
莫放轆轤鳴玉井
偷閒要補五更眠

思歸

白髮滿青鏡
悵然山水身
那因五斗米
常作半塗人
涉世風波惡
思歸懷抱真
會當求鉏斧
送老鏡湖濱

齒痛有感

眼暗頭童負聖時
齒牙欲脫更堪悲
暮年漸解人間事

蒸食哀梨亦自奇

南窓睡起

夢中忘却在天涯一似當年錦里時
狂倚寶箏歌白紵
醉移銀燭寫烏絲
酒來郫縣香初壓
花送彭州露尚滋
起坐南窓成絕嘆
玉樓乾鵲誤歸期

又

晝漏迢迢暑氣清
不妨小倦帶餘醒
夢從隴客聲中斷
愁向湘屏曲處生
風度簾旌紅浪颭
窓明香岫碧雲橫

閒情賦罷憑誰寄
悵望壺天白玉京

初夏

百葉盆榴照眼明
桐陰初密暑猶清
深深簾幕度香縷
寂寂房櫳聞燕聲
細煨詩聯憑几靜
思棋劫對楸枰
浣花光景應如昨
回首西州一愴情

浣花四月十九日也

讀程秀才詩

程子晚相得居然一坐傾
新詩欲飛動病眼為開明
英妙非凡質衰遲畏後生
吾徒可相賀五字有長城

晨起

一官又寄汝江頭落魄文園故倦遊
榻上鐸聲悲破夢
簷邊桐葉冷生秋
暮年作吏寧長策
薄祿縻人尚小留
晨起凭欄嘆衰甚
接羅紗薄髮飈飈

雨夜

兩鬢新霜換舊青
客遊身世等浮萍
少年樂事消除盡
雨夜焚香誦道經

得京書或怪久不通問

慣向江湖鍛羽翰雲霄那敢接鷓鴣百年未必如炊久
萬事真須作夢看白首據鞍慙俠氣青燈顧影嘆儒酸
手遮西日成何味還我平生舊釣竿

水亭

日淡暑猶薄雨餘風更清脩然水亭立試此葛衣輕晒
粉憐孤蝶穿枝喜晚鷺誰知簿書裏也復得吾生

醉眠

達士如鷗夷無客亦自醉癡人如撲滿多藏作身祟放

翁亦何長偶自遠聲利胸中白如練不著一毫偽醉來
酣午枕晴日雷起鼻寄謝敲門人予方有公事

感舊絕句

鳴翎堠前山簇馬雞蹤橋下水連天金丹煉成不肯服
且戲人間五百年

又

鵝黃酒邊綠荔枝

鵝黃廣漢酒名
綠荔枝出敘州

摩訶池上納涼時水

紈不畫驂鸞女却寫江南白紵辭

又

南市夜夜上元燈
西郊日日是清明
青羶犢車碾花去
黃金馬鞭穿柳行

又

十月新霜兔正肥
佳人駿馬去如飛
纖腰嫋嫋戎衣窄
學射山前看打圍

又

半紅半白官池蓮

江瀆廟池

半醒半醉女郎舩
鴛鴦驚起何

曾管折得雙頭喜欲顛

又

紅葉琵琶出嘉州四絃彈盡古今愁胡沙漫漫紫塞曉

漢月娟娟青冢秋

又

美人傳酒清夜闌欲歌未歌愁遠山蒲萄一斗元無價

換得涼州也是閒

晝臥聞百舌

雨後郊原已遍犁陰陰簾幙燕分泥閒眠不作華胥計
說與春鳥自在啼

江南謂百舌為春鳥

寄呂博士

薄宦東西蜀僑居太少城休論九年謫喜識萬人英別
久心常折書來眼未明功名君自力丘壑我平生

遊疎山

我願匹馬飛騰遍九州如今苦無騷裊與驂騑葛陂之
龍又難致兀兀安得忘吾愁幸餘一事差可喜雲山萬

里芒屨底曳杖行穿嶠冢雲試茶手挹香溪水江西山
水增怪竒疎山之名舊所知惜哉不見侏儒師尚想薪
水俱空時寺門欲近山若拆老樹蒼崖含古色挂包便
住吾豈能一來要是疎山客

疎山東堂晝眠

飯飽眼欲閉心閒身自安樂超六欲界美過八珍盤香
縷紫簷斷松風逼枕寒吾兒解原夢為我轉雲團

是日約子

分茶

山中作

朱墨紛紛訟滿庭，半年初得試山行。
燒香掃地病良已，飲水飯蔬身頓輕。
日落三通傳浴鼓，雨餘千耦看農耕。
故巢光景還如此，為底淹留白髮生。

余書堂在雲門寺西

觀蔬圃

菰芥可菹芹可羹，晚風咿嘍桔槔聲。
白頭孤宦成何味，悔不畦蔬過此生。

東堂晨起有感

不解飛車越九州青鞵處處為山留百年未盡且作夢
三日間行聊散愁世上幾經華表柱尊前好在黑貂裘
龍泉幸是無人斲暮露光芒上斗牛

金谿道中

雲閣苦竹市雨來烏石岡駕犁雙犢健鬻繭一村香天
地君恩重風埃吏責忙敢辭坡路滑且領筍輿涼

小憩前平院戲書觸目

道邊小寺名前平殘僧二三屋半傾旁分千畦畫楸局

正對一山橫翠屏修纖弱蔓上幽援

一作
援

堅瘦穉栢當

前榮稻秧正青白鷺下桑椹爛紫黃鸝鳴村虛賣茶已
成市林薄打麥惟聞聲泥行扶犁吒新犢野饁燒笋炊
香杭十年此樂發夢想忽然到眼難為情上車欲去復
回首那將暮境供浮名

遣興

小麥登場雨熟梅閉門病眼每慵開酒盃不解為愁敵
書卷纔開作睡媒骨朽空名垂斷簡冢荒殘碣臥蒼苔

紛紛傾奪知何得老覺人間但可哀

雨後獨登擬峴臺

高城斷處閣橫空目力雖窮興未窮燕子爭泥朱檻外
人家曬網綠洲中誰能招喚三秋月我欲憑陵萬里風
更比峴山無湛輩論交惟是一枝筇

數日訴牒苦多憊甚戲作

江南五月暑猶薄梅子正黃風雨惡庭中訟獠不貸人
急甚常如虎遭縛空坐鼠迹留几塵賦詩飲酒疑前身

脫歸徑臥與壁語敢恨無人問良苦

與黎道士小飲偶言及曾文清公慨然有感

臨川稅駕忽數月嗜睡愛閒常閉門君詩始愜病僧意
吾道難為俗人言秋雨淒淒黃葉寺春風酣酣綠樹村
曾公九原不可作一尊破涕誦招魂

念歸

江城五月朝暮雨雨腳纔收水流礎酒盃未把愁作病
塵柄欲拈誰共語有時暫解簿書圍獨坐藤牀看香縷

林塘渺渺鳩正懽簾幙陰陰燕新乳湖山舊隱入我夢
白首忘歸獨安取一生花裏醉春風即今願作扶犁翁
五月十一日夜且半夢從大駕親征盡復漢唐故
地見城邑人物繁麗云西涼府也喜甚馬上作
長句未終篇而覺乃足成之

天寶邊兵陷兩京北庭安西無漢營五百年間置不問
聖主下詔初親征熊羆百萬從鑾駕故地不勞傳檄下
築城絕塞進新圖排仗行宮宣大赦岡巒極目漢山川

文書初用淳熙年駕前六軍錯錦繡秋風鼓角聲滿天
首宿峯前盡停障平安火在交河上涼州女兒滿高樓
梳頭已學京都樣

雨夜

牆西泥三寸牆東草三尺可憐白鹿泉蛙龜紛狼籍濕
螢如隕星入戶黏几席病夫本嗜睡況此風雨夕永懷
灤西寺更憶山南驛陳迹不可追昏然墮吾幘

又

簷高雨聲壯堂豁霧氣入飛螢照畫棟相逐光熠熠向
來經春早蒼耳暗原隰微官又厚責撫事百憂集三日
雨不休四野苗盡立登高思賦詩簿書縛人急

焚香晝睡比覺香猶未散戲作

小屏煙樹遠參差吏散身閒與睡宜誰似爐香念幽獨
伴人直到夢回時

又

燕梁寂寂篆煙殘偷得勞生數刻閒三疊秋屏護琴枕

臥遊忽到瀼西山

仲夏小旱方致禱忽大雨連日江水為漲喜而有

作

早苗垂槁歎何堪大雨誰知變立談
翠麓青林吞欲盡惡風白浪戰方酣
江翻龜窟連雲澤雷挾龍腥起雪潭
從此年豐真少事炷香終日坐蒲龕

冒雨登擬峴臺觀江漲

雨氣分千嶂江聲撼萬家雲翻一天墨浪蹴半空花噴

薄侵虛閣低昂泛斷槎壯遊思夙昔蔡醉下巴

薤庭草

露草煙蕪與砌平羣蛙得意亂疎更微涼要作安眠地
放散今宵鼓吹聲

蛺蝶詞

蛺蝶子去復來草齊腰花亂開蜜蜂辛苦為人計林鶯
百轉胡為哉嗟爾蛺蝶獨得意飛來飛去無嫌猜追花
逐絮闌干角人生安得如汝樂

大雨踰旬既止復作江遂大漲

牆角蚊雷喧甲夜濕星昏昏出雲罅臨堂仰占久歎咤
懸知龍君未稅駕行人困苦泥沒胯居人悲啼江入舍
便晴猶可望秋稼努力共禱城南社

又

一春少雨憂旱暵熟睡湫潭坐龍嬾以勤贖嬾護其短
水浸城門渠不管傳聞霖潦千里遠榜舟發粟敢不勉
空村避水無雞犬茆舍夜深螢火滿

民家避水多依丘阜以小舟載米賑

之

燒丹示道流

昔燒大藥青牛谷磊落玉牀收箭鏃扶桑朝暾謹火候
仙掌秋露勤沐浴帶間小瓢鬼神衛異氣如虹夜穿屋
點成黃金棄山海揮手人間一裘足明年服丹徑仙去
洞庭月冷吹橫玉相逢只恐驚倒君毛髮毵毵垂地綠

書感

半世狂疎踐駭機暮年持此欲安居曾憑香火消前業

已築茆茨訟昨非

余村居築小軒以昨非名之

薄俗慣看翻覆手憂

心空復倒顛衣煙蓑雪笠家風在送老湖邊一釣磯

夏日

病退身初健時清吏更休渴蜂窺硯水慵燕息簾鉤碁局每坐隱屏山時臥遊真成愛長日未用憶新秋

寄統

大兒挈藥囊小兒負書笈共作蘭亭遊詎必羣賢集言此二十年白首終未踐汝復守荆扉經年不相見楚越

天一涯書疏何由頻諸弟亦可憐說兄輒酸辛江城秋
尚遠桐葉落可埽悵然懷故谿菱絲雨中老

自訟

家弊須微祿年衰尚遠遊未逃朋友責更遣吏民羞采
藥思長往傳書却小留微風入桐葉分我一簾秋

夏日晝寢夢遊一院闌然無人簾影滿堂惟燕跼
箏絃有聲覺而聞鐵鐸風響璆然殆所夢也邪
因得絕句

桐陰清潤雨餘天
簷鐸搖風破晝眠
夢到畫堂人不見
一雙輕燕蹴箏絃

虛堂

暑氣虛堂一點無
爽如秋露貯冰壺
滄州未遽浮舴艋
碧井聊聽放轆轤
肅肅清風生薤簾
酣酣美睡付紗幮
惱人不奈奴兵輩
環抱文書待日晡

江西率以申初治文書至暮夜乃已

夢仙

夢朝謁大宮殿仰視去天甚近星皆大如月氣候清寒如十月間時庚子六月一日也

中宵遊帝所
廣殿綴仙官
天逼星辰大
霜清劒珮寒
賦

詩題碧簡侍宴跨青鸞惆悵塵緣重夢殘更未殘

自嘲

夜作看花夢朝賦飲酒詩吾夢固忘矣詩亦聊自欺荒

園無佳花牽牛漫踈籬給酒月四斗

官供酒月止四斗耳

一觴難

屢持悲歡有定數未至誰得知願從大鈞問一笑在何時

長歌行

燕燕尾涎涎橫穿乞巧樓低入吹笙院鴨鴨嘴啞啞朝

浮杜若洲暮宿蘆花夾嗟爾自適天地間將儔命侶意
甚閒我今獨何為一笑乃爾慳世上悲歡亦偶然何時
爛醉錦江邊人歸華表三千歲春入瑩篴十四絃

對酒

簷鐸鳴雜珮簾旌動微波我老嬾讀書如此長日何名
酒來清江嫩色如新鵝奇蒨映玉盤珍鮓開綠荷萬事
姑置之適然酣且歌宦遊亦何好且復小婆娑秋風雲
門道踏月捫青蘿

自詠

夢歸不恨故山深
霜雪今年已滿簷
報國有心身潦倒
養生無術病侵尋
晨興聊取經遮眼
夜坐時憑易洗心
安用更為逃暑飲
虛堂三復自蕭森

夏日睡起

簾紋似秋水
含風颭微漪
帳幅如春煙
縹緲不受吹
團扇墮枕邊
皎皎素月暉
非睡復非覺
心定息自遲
茶熟我亦起
寒泉掬珠璣
浮瓜空把玩
甚矣今年衰

所居堂極涼雖三伏常有秋意也偶得長句

高棟虛簷六月涼野人誰遣寄華堂炎威自避重重幙
清吹時生曲曲廊白苧出箱開疊雪甘瓜隨刃落輕霜
憑誰為報金羈客滿帽京塵有底忙

雨後露坐小酌

閉門誰與樂頽年旋掃桐陰近酒邊病久一春稀見蝶
雨多六月始聞蟬官倉求飽真聊爾山墅懷歸每惘然
從此讀書仍復嬾惟留白眼望青天

日暮南窓納涼

冠蓋塵沙得我憎
脫巾聊喜髮鬢髥
素娥東踊行空濶
清吹南來掃鬱蒸
團扇正閒看破墨
矮牀欹臥怯文藤
扁舟歸去應尤樂
莫羨金盤賜苑冰

中夜起登堂北小亭

幽人曳杖上青冥
掠面風輕宿醉醒
朱戶半開迎落月
碧溝不動浸疎星
禽聲格磔頻移樹
花影扶疎自滿庭
歎息明年又安往
此身何啻似浮萍

登擬峴臺

顛顚思吳客淒涼擬峴臺一年秋欲到兩鬢老先催
裊裊菱歌斷翩翩水鳥來倚闌哦五字未穩莫輕回

夜意

灑地移牀曲檻前葛衣蕭爽接羅偏庭空秋近露沾草
月落夜闌星滿天靜待微風停素扇旋消殘酒漱寒泉
脩然自與氛埃遠安用騎鯨學水仙

道院遣興

微官不復嘆頭顱高棟虛窓樂有餘中夜墻鈴空際語
望秋庭樹月中疎甌炊青飯留巖客露點朱毫勘玉書
猶恨未成歸剡曲小舟閒采白芙渠

夜行至白鹿泉上

小雨病良已新秋夜漸長隔城聞鶴唳出戶逐螢光荒
徑穿蒙密遙空望莽蒼泉聲落環珮肝肺為清涼

堂中以大盆漬白蓮花石菖蒲脩然無復暑意睡

起戲書

海東銅盆面五尺中貯澗泉涵淺碧豈惟冷浸玉芙蓉
青青菖蒲絡奇石長安火雲行日車此間暑氣一點無
紗幮竹簟睡正美鼻端雷起驚僮奴覺來隱几日初午
碾就壑源分細乳却拈燥筆寫新圖八幅冰綃瘦蛟舞

初秋

濕螢相逐照高棟又見一年風露秋流落江湖常踽踽
掃平河洛轉悠悠簿書終日了官事尊酒何時寬客愁
擬倩天風吹夢去浩歌起舞散花樓

書懷絕句

不到天台三十年
草菴猶記宿雲邊
老僧曉出松門去
手挈軍持取澗泉

又

憶過棲賢見蜀僧
雲堂十月冷生冰
定回菽菽聞窓雪

一椀琉璃照佛燈

蜀僧左縣海辨也

又

丈人祠西山谷盤
麻姑洞前松櫟寒
仙翁欲覓渺無處

聞在青溪浴大丹

仙翁謂
譙先生

又

早佩黃庭兩卷經
不應靈府雜羶腥
憑君為買金鴉觜
歸去秋山斲茯苓

又

未駕青鸞返帝鄉
三江七澤路茫茫
看山看水無程數
漁艇為家芡作糧

狂吟

浮世何須宇宙名一狂自足了平生
秋風湘浦紉蘭佩
夜月緱山聽玉笙
學劍慣曾遊紫閣
結巢終欲隱青城
年來自笑彌耽酒
百斛蒲萄未解醒

聞雨

潭底垂龍喚不應
驕陽似欲敗西成
虛堂永夜耿無睡
起聽四郊車水聲

初秋小疾效俳諧體

宿疾逢秋劇衰容
逐日添專房一竹几
列屋萬牙籤

今年

傳書頗多遣悶憑清聖忘情付黑甜晚來風月好一笑捲疎簾

雨後極涼料簡篋中舊書有感

日昃小雨不至晡雨雖未足涼有餘細泉泠泠咽幽竇
清吹策策驚高梧笠澤老翁病蘇醒欣然起理西齋書
十年燈前手自校行間顛倒黃與朱區區樸學老自信
要與萬卷歸林廬爾來世俗喜變古鑿空飾詐無根株
愀然撫几三太息力薄抱恨何由祛蘭臺漆書非已責

且為籤勝除蠹魚

秋夜

湖海秋初到房櫳夜轉幽露濃驚鶴夢月冷伴蛩愁生

計依微祿年光墮遠遊嚴灘已在眼早晚放孤舟去年欲自

三衢舟行泛七里瀨歸山陰今竟當為此行也

抄書

書生習氣重見書喜欲狂擣藥潢剡藤辛苦補散亡且

作短檠伴未暇名山藏故家借籤帙舊友餉朱黃借書于王

韓晁曾諸家而呂周輔
字文子友近寄朱黃墨

皇墳探八索奇字窮三蒼儲積

山崇崇探求海茫茫一笑語兒子此是却老方

晚自白鹿泉上歸

坐穴藜牀愧未能酌泉聊喜曳枯藤詩從病後功殊少
酒到愁邊量自增事業何由垂竹帛笑談空覺負交朋
興闌却逐棲鴉返寂寞西窓已上燈

秋旱方甚七月二十八夜忽雨喜而有作

嘉穀如蒸稗草青沉憂耿耿欲忘生釣天九奏簫韶樂

未抵虛簷瀉雨聲

秋日小雨有感

七月江邊暑已微
虛窓臥看雨霏霏
淒涼蛩伴草根語
憔悴鵲從天上歸
志士酒酣看寶劒
美人淚盡倚鴛機
嗟予亦有新秋感
遙憶蒼苔滿釣磯

書李商叟秀才所藏曾文清詩卷後

隴蜀歸來兩鬢絲
茶山已作隔生期
西風落葉秋蕭瑟
淚灑行間讀舊詩

碧海行

碧海如鏡天無雲衆真東謁青童君九奏鏗鏘洞庭樂
八角森茫龍漢文共傳上帝新有詔蚩尤下統旄頭軍
徑持河洛還聖主更度邊徼清塵氛藝祖騎龍在帝左
世上但策雲臺勲

道院遣興

滿鏡新霜老可驚十年煙隴廢春耕黃絲黑黍有歸夢
白髮蒼顏無宦情浮世不堪供把玩安心隨處是修行

尚嫌未到無為地
酷愛朝鐘暮磬聲

夜酌

遙夜澆愁賴麴生
燈前忽見臥長瓶
比紅有句狂猶在
染白無方老已成
園徑露螢粘濕草
塢簷風鐸亂疎更
悲秋要是騷人事
未必忘情勝有情

言懷

莫笑生涯似斷蓬
向來諸俠避豪雄
報仇使氣風塵裏
吹竹彈絲錦繡中
樂事眼看成昨夢
倦遊心伏作衰翁

論交尚喜筇枝在白鹿泉邊遡晚風

送客城西

倦客憑鞍半醉醒秋光滿眼歎顏齡日斜野渡放船小
風急漁村攤網腥客思不堪聞斷雁詩情彊半在郵亭
歸來更恨城笳咽烟火昏昏獨掩屏

雨夜

庭院蕭條秋意深銅爐一炷海南沉幽人聽盡芭蕉雨
獨與青燈話此心

病中作

浮世寄酣枕勞生居漏船已悲身老大更著病沈綿親
舊動千里歡娛無百年牀頭周易在端擬絕韋編

社日小飲

社日西風吹角巾一尊彊醉汝江濱杏梁燕子還堪恨
歸去匆匆不報人

晚到東園

岸幘尋青士憑軒待素娥官身苦日短荒圃得秋多醉

眼輕浮世羈懷激浩歌功名從蹭蹬詩酒且婆娑

秋晚登擬峴望祥符觀

放翁局促留江干愛此樓前煙水寬
雨昏回望殿突兀秋晚剗覺山蒼寒
中原未復淚橫臆故里欲歸身屬官
雲外飛仙故不遠喚渠小為駐青鸞

秋思

黃落梧桐覆井牀莎根日夜泣寒蟬
老生窺鏡鬢成雪俊鶻掣韝天欲霜
破敵誰持白羽扇從軍曾擁綠沈槍

壯心自笑何時豁夢遶祁連古戰場

病目廢書終日危坐

肺渴常止酒目昏復捐書蒲團坐袖手一窓寬有餘心
知世緣薄分與鐘鼎疎湛然千仞淵養此徑寸珠光明
照憂患何適不自娛白雲可與友晴空閒卷舒

感昔

常記東園按舞時春風一架晚薔薇尊前不展鴛鴦錦

只就殘紅作地衣

成都小東門
外趙氏園

又

八陣原頭縱獵歸
割鮮藉草酒淋漓
誰知此夕西窓裏

一盞青燈獨詠詩

八陣原在成都廣漢之間

視陂至崇仁村落

津亭徙倚客衣單
秋盡江南亦已寒
雁翅不禁疎雨濕
楓林初染早霞丹
少年已歎儒冠誤
暮境更知行路難
倦馬歸來踏殘日
長吟聊得寫憂端

馬上

客遊多感慨老病少歡欣去去穿村市翻翻吹帽羣天
低落平野雁遠入寒雲漸覺江城近秋笳馬上聞

寄周洪道叅政

半生蓬艇弄煙波最愛三湘欸乃歌擬作此行公勿怪
胸中詩本漸無多

又

菱舟煙雨久思歸貪戀明時未拂衣乞與一城教睡足
猶能覓句寄黃扉

北窓

白首微官只自囚
青燈明滅北窓幽
五更風雨夢千里
半世江湖身百憂
壯志已孤金鎖甲
倦遊空攬黑貂裘
灞亭夜獵猶堪樂
敢恨將軍老不侯

登擬峴

翠阜圍平野
朱樓壓繚牆
風回半汀雁
雲護一天霜
有地聊容拙
無方可療狂
白頭詩興在
吟罷意差彊

休日

賜休暫許養衰殘
靜院脩然晝掩關
釀酒移花調護悶
弄琴洗硯破除閒
與人多忤讒
銷骨報國無功愧滿顏
一寸歸心向誰說
小屏依約剡中山

別張教授歸獨登擬峴

小閣敞朱扉
停車暫息機
行人呼晚渡
幼婦浣秋衣
霜樹欹危堞
風鴉滿落暉
登臨客愁裏
況是送將歸

晚晴至索笑亭

中年苦肺熱
賸喜見新霜
登覽江山美
經行草樹荒
堂

空響棋子盞小聚茶香興盡扶藜去斜陽滿畫廊

新釀熟小酌索笑亭

新酒黃如脫殼鵝小園持盞暫婆娑文章不進技止此
仕宦忘歸人謂何宿業簿書昏病眼夢遊煙雨濕漁蓑
醉中笑向兒童說白髮今年添幾多

乾道初予自臨川歸鍾陵李德遠范周士送別于
西津是日宿戰平風雨終夕今自臨川之高安
復以雨中宿戰平悵然感懷

故人已作山頭土倦客猶鄣陌上塵十五年間真一夢
又騎羸馬涉西津

又

十五年前宿戰平長亭風雨夜連明無端老作天涯客
還聽當時夜雨聲

村舍小酌

野性安衡茅傑屋愁耽耽上不補縣官下有肉食慙雖
非策雲驥實鄙作繭蠶失計不容悔漁蓑換朱藍少壯

尚可力老大真難堪今朝意頗豁村舍寄半酣玉版烹
雪筍金苞擘霜柑豈惟寫我憂亦以稅我驂弄筆作一
笑何用與客談逡巡上車去濕翠浮煙嵐

白塢道中蔡臥輿行

小疾載臥輿獨飲亦薄醉朝離戰平館午過白塢市清
寒正宜嬾搖兀更益睡所嗟下程早不得究此味忽憶
從軍時雪夜馳鐵騎壯心誰復識撫事有餘愧

宿城頭鋪小飲而睡

金步 卷十二
亭傳臨江滸牀敷息我勞屋茅殘月冷庭樹北風塵墟
市饒新兔村場有濁醪氣衰仍病著小飲不能豪

豐城村落小憩

霜信催寒力尚微郵亭繫馬旋添衣平郊極目冬耕遍
小婦簾花晚餉歸孤宦每隨征雁遠故人已似曉星稀
上書自効真須猛菰正堪炊蟹正肥

再題

柴門數頃秋半日為遲留老驥厭伏櫪飢鷹思下韝野

橋危欲斷山雨落還收何許丹青手端能寫此愁

發豐城縣

豐城古縣已再遷出郭十步江渺然冷雲四合欲下雪
柔櫓數聲初放船孤村燈火照破驛客子何以娛今夕
不辭金盃醉十分要看玉花深一尺

豐城高安之間憩民家景趣幽邃為之慨然懷歸
數家聚雲根細路入叢薄濺濺石渠水來往一略約有
無鄰里通笑語婦子樂濁醪時相就青蔬缺鹽酪日暮

歸閉門續火星煜爚先期畢租稅老不入城郭嗟予獨
何事早挿紅塵脚故山未成歸悵望有餘忤

宿華嚴寺

夜宿華嚴寺人扶到上方喚僧同看畫避佛旋移牀小
雨不成雪烈風還作霜鐘殘燈漸暗趺坐默焚香

寄奉新高令

小雨催寒著客袍草行露宿敢辭勞歲饑民食糟糠窄
吏情官倉鼠雀豪只要間閭寬箠楚不須亭障肅弓刀

九重屢下丁寧詔此責吾曹未易逃

高安州宅三詠

丹井

神仙李八百煉丹處

丹成人已仙遺竈亦已平尚餘松根井鏘然環玦聲我

來試一啜槁面還童嬰祝君勿關鑰人人遣長生

井有
關楯

護
之

劒池

李八百
洗劒處

我壯喜學劒十年客峨岷毫髮恐未盡屠釣求隱淪今

年獨何幸見此度世人夜深來較術雷雨戰江津


偃松

巨松偃青蓋閱世歸獨存頗疑古仙翁藏丹在其根或
是結靈藥百尺有伏龍終隨風雨化不死何足言

與高安劉丞遊大愚觀壁間兩蘇先生詩

野性縱壑魚官身墮穽虎適得建溪春頗憶松下翁微
霜初變寒短景已過午佳客能聯翩老宿相勞苦懷哉
兩蘇公去日不可數泉局一埋玉世事幾炊黍吾儕生

苦晚佇立久惻楚尚想来遊時黃鍾賡大呂



劍南詩彙卷十二